



上命賑濟一方謂府庫有限錢糧僅續饑民之  
命憫青黃不接時月豈勝餓莩之多羣心  
所欲者五日一風十日一雨衆情所憂者  
夏月大水秋月亢陽廷舉跽進瓣香爲民  
祈禱伏願體天行化旋乾轉坤使四時和  
而品彙亨五穀熟而萬民足非但廷舉免  
瘵官情事之罰而神亦丕顯憂民助國之  
靈若今歲再遭水旱虫蝗而楚人必爲魚  
鱉鬼域諒非神所忍見抑豈廷舉之所忍

言哉

恩命碑記

番禺馮繼科學正

易稱晉錫書著懋賞凡以報有功也邇乃  
畀之中貴隆以外權錫之以典秩不已渥  
子君子曰無爵而勸上也服寵而榮次之  
貪天以爲己力下矣夫威福以馭下人主  
之柄靖共以承上人臣之忠茂忠竊柄涼  
德厚圖鮮不及矣稽諸往牒勃鞞管蘇樹  
功於楚晉景監繆賢著庸於秦趙漢唐而  
下則鄭衆之辭賞嚴遵美之避權斯其選  
也嗚呼茲寵渥之所由畀乎我

國家懸爵賞以旌賢能而又何靳焉方今  
聖天子御極昭德塞違覃敷殊典時則有若敬  
翁王公以中貴之賢茂膺光寵承

命以來夙夜兢惕以圖報稱於萬一于是禮神  
秩祀以昭其誠慈愛樂施以溥其惠崇儒  
下士以摛其謙歲獻方物壘進符經宣其  
勤也時詣玄宮躬建金籙効其忠也以故

太和之民賴以阜安邊徼賴以寧謐流移  
姦宄賴以綏輯凡以其敬德致之也此公  
之所以受知于上而

皇上之所以寵遇於公者福澤寧有涯哉豈但  
金帛斗蟒玉帶之貺而已耶公以嘉靖己  
亥歲由內官監右監丞來鎮茲土越二年  
壬寅遷左少監甲辰改陞太監歷十稔于  
茲矣一旦進學正繼科訓導劉輻輩于庭  
出恩命牒以示屬科紀之用寓對揚王休

之意科不佞竊以恩命之頒匪以侈榮也  
以章勸也惟公無怙寵倚法以永有辭益  
堅晚節以仰答知遇之隆不其偉哉行且  
出入禁闈左右

聖躬以樹宦績於不朽竊以是爲公望復爲之  
歌曰仰瞻兮帝庭上應兮四星帝眷南顧  
兮自漢徂荆太和崇祀兮有厥靈自公之  
來兮山岳弗驚物阜民康兮邊境以寧願  
曾玄麻兮福我羣生稽首颺言兮對越明

明寵光奕世兮永與大岳而崢嶸

提督藩臣公署記

陳良謨參議

按均志參議行省故在城外劉石寇興爰徙城內地偏坤隅堦雉臨壓繚垣之表蕭艾之墟以高則邏卒俯矚其闔闔以卑則雉雘升接於界恩陳子居之心竊病焉東距百步開解一區名曰舊府蓋提督內臣之遺第也堂甍陔腐偏錯無次於是陳子

撤而新之剝隆爲墀築庫爲基覆其基爲廳事翼以二厦廳之後爲甬廊廊之後爲燕寢之堂其前爲門二其左右爲廡舍四凡爲楹者三惟堂之楹五其東別有屋八楹以居胥吏其西又有廳有堂有寢室有庖滷帑圃之所以居家衆凡爲楹總二十有四大畧如其中之制而微材匪別構工夫民役七閱月而告成陳子居之心安而體便因自諗曰是何前之病而今之安耶

君子明德理下不求重內願外焉是毗舛也甚矣雖然外內一者也烏鼠弗祛君子焉羊重門洞開心體斯豁謂作室無與於治躬猶言盛服無與於修敬也而况蒞蒞之所哉工既竣知州呂箕指揮江山暨監後鎮撫王暉典術孫繼本咸請紀其事示永久焉弗許又請乃麓舉其畧鑿諸石碑陷於壁以識所由

神惠倉記

方升 參議

神惠倉者佃民之倉也倉諸費皆取之宮中而人無與焉以是爲神之遺之也故名神惠永樂十一年

天子有事於大岳于時宮庭之屬遍嶮嶢道士廩食者四百人人給之田復徙民往爲之耕凡五百五十戶謂之佃民佃民不屬有司征徭賑貸不相及予奉

命提督諸宮至之日問起廢知荒備缺狀大懼無以應待舉火之民謀之提督少監滇南

李公曰唯弗事事無備無備多患民弗揀也柰何李公曰君盍圖之明年歲饑佃民告貸乃發宮中錢戶十百約歲稔入穀四石於是得穀二千二百二十石先是佃民之輸於宮者歲入米八百石吏弗詰也乃籍其數隸之官改令納穀於是復歲得穀千百石予喜曰可以成事矣南城下西偏佃故有倉歲無所入毀爲溷壤遂即其地復建焉中爲堂堂之北爲九廩東西各五

廩前爲門門之外爲池既落成乃進諸民而告之曰唯江河之不廢流也唯行潦之朝盈而夕除也無他能繼與不能繼也今與汝約歲饑則盡除以貸汝歲稔則還之官弗出息弗加量石納耗五升違期者罪之過取者罪之欺以濫惡者罪之及盜一貫以上悉抵其罪加墨不用吾命者視吾案於是佃民相率而前曰大夫匪使其私惟恭生生敢自隕越于下是役也予與提

督以命諸佃諸佃竝作判官陳大策指揮  
江山實綱紀之千戶章乾吏目楊遷義民  
郭秉鉞暨羣工百執事五里之皆各程其  
勤作之二十有三旬始訖事于今丁酉三  
月五日訖事之日予有闕命刻石紀諸門  
左而後即衢蓋不忘其所有事也

勅修玄岳太和山宮觀願末

陸杰 工部侍郎

玄岳太和山盡楚西北盤薄方八百里其脉自

終南迤邐而來極秀拔極深阻相傳爲

玄帝修真顯化之地玄武北方之神虛危之精

豈其降而爲人還復爲神耶自漢以來歷

代崇奉至我

成祖文皇帝起自燕邸入正大統惟神陰翼顯  
有靈異乃創建七宮三十六巖廟蓋神仙  
所居多離宮別館亦以象之表爲

大岳禮視

郊丘百神莫之或先當時役二十萬衆費以億



萬十二載而始成規制宏麗誠爲

國爲民不容自己之心也成化間益以迎恩

是爲八宮歲月滋久漸亦改觀

皇上敬天勤民治隆化洽端委之暇天啓

宸衷有懷飭蠱爰

命巡撫右副都御史屠公大山撫治右僉都御

史沈公良才巡按御史胡君宗憲期日計

度以

聞頒

帑銀一十一萬有奇

勅杰董是役杰奉

命即山次周視兢慄擊之以審空實啓之以驗

完腐會費有加焉於是慎簡羣屬之良者

得七十三人各司其職檄右叅議雷君賀

署都指揮僉事李君經監之先是採石擬

於梅溪嶺獅子溝白窯擬於宣城清水港

黑窯擬於槐樹關故常需材宜無出此特

陟危履隘轉盤之費數倍物值永樂間宮

各有塘久而湮沒於是覓而得之白窯移  
於均之小江口鄖之潦石鋪柘溪口黑窯  
於石板灘蒿口花栗岡故有道可避天門  
險峻於是刊木通之宮宇率依山薄崖非  
假梯架莫可致力須木須麻各以數十萬  
計乃芟密林伐山藤諸費之省靡不類是  
工以宮分於是合而爲四曰太和曰南巖  
曰紫霄曰玉虛而取次於淨樂五龍遇真  
迎恩度宜量可力裕而事集矣撤而新者

二百一十四楹仍而葺者二千六十八楹  
垣九千一百餘丈石路加垣之七太和故

奉

玄帝親師像

皇上感于夢寐

命改鑄範金入山初道奉

旨建石坊

命曰治世玄岳九殿宇供噐整葺新美無異厥  
初壬子季夏告始明年孟冬訖工用

帑銀九萬有奇官役之需出有司者不隸焉  
經始之日即有霞光之應

上特遣官祭謝宜都漁人夜獲巨木於江存芥  
記甚異均鄖之間玄白丹黃諸土出焉聞  
者神之

崇藩

徽藩捐祿助役有差

御製紀成有碑有亭則前巡撫屠公撫治沈公  
巡按明君今巡撫右副都御史馮公岳巡

按御史朱君瑞登清戎御史周君如斗發  
公羨共成之提督太監王公佐終始協贊  
亦可以觀人心矣夫事之有係於

國於民而禮所得爲者君子不謂之勞不謂  
之費也太和振古名山海內無遠無近罔  
不齎誠朝禮揭揭乎若日月之行天雖昧  
者知其不可誣也杰見道路十步五步拜  
而呼號聲振山谷亦既登絕頂瞻

玄像則又滄泣不已謂夙昔傾戴今始一覩性

真感發至有欲言而不能自達者茲典也  
聖皇上隆繼述下慰羣黎誠千載之希際而茲  
山運數之值亦豈偶然之故哉鄖襄比歲  
旱潦民食告艱工所轉米粟給傭直以力  
就食所賴生全者無算

聖皇懷保之仁亦於是乎寓謹勒顛末以告將  
來云

太和山記

汪道昆 巡撫都御史

我國家尊六岳爲帝時帝玄君昔帝降于

麋今治故宮曰淨樂其東當始降之室治  
紫雲亭去州五十里入西南表峽口曰玄  
岳環中山四合溪流出入無端負坎抱離  
可當吉土

文皇帝跡異人所在爲之築遇真宮異人遺杖  
筇悉留中命尚方鑄金象之歸守者入僊  
關爲元和觀西入馳道其南爲玉虛宮山  
水脩廣倍遇真舊爲武當縣南山如負袞  
信非玄武不足以當之宮制視漢未央即

祈年勿論已其西池亭洞闢亦異人所棲  
西上望僊樓愔然若將有遇也馳道西爲  
僊桃觀通八僊臺又西爲華陽亭跨石橋  
臨夫容沼西出則田廬鷄犬亦爲一區去  
玉虛躡西南進次迴龍觀太玄觀入紅門  
迴房陵道道傍有太上巖巖中鑿石象太  
清其左二龍蜿蜒巖石下又南則八僊觀  
中堪輿右入七里溝脩木千章如突夏緣  
岡爲開山故道遺巨石在焉賓太上爲羅

公巖高出絕壁往年屋之居羅太史凡七  
楹舉目望西南諸峯盡在目眦反紅門入  
官道進次太子坡陂陀中分扼其扼爲復  
真觀周垣跨道逶迤高下因之出垣下行  
乘天津橋濟九渡澗澗道幽絕其陽則淵  
默亭沿澗東入玉虛巖石嶂夾流若干里  
嶂若步障雜樹繪之深入石磴浸高若自  
明河趨閣道磴窮則棧棧窮則巖巖上視  
有龍虎文其右雷文故中奉帝居右奉雷

部西南望則天柱當峽中循故道還由淵  
默西南上除道曲折望行者如登闐風紫  
霄附展旗峯石嶂崇廣皆數十百丈三公  
五老前侍亦一隩區宮制高倍玉虛脩當  
其半奉祠者無慮數千指其廬率高下居  
宮前爲禹跡池築小亭出池上池右福地  
其陽爲賜劍臺其陰則萬松亭出木末太  
子巖出宮後亦有亭由禹跡右旋古道甚  
治乃今多徑者廢勿行古道西上當南巖

之南舍南巖西歷黑虎巖泉石相望于道  
昔有巢居者遺構猶存進次杉木林分二  
道其右下行涉澗遵宿莽容單車峽中轉  
入西南出峽爲清風岬蓋故韓糧道也左  
上行躡萬丈峯下登朝天宮其東由鳥道  
出三公巖則上巖也路險絕不容足學禳  
者劉媪居之其下亦爲三公巖相距三舍  
巖南鄉爽塏可居然必取道玉虛巖多歷  
險阻始得至朝天西上拾級八百五十有

五當天門三天門皆寶石峽中有巨靈斧  
跡初入門降數等稍平衍依三公峯爲文  
昌祠過祠則摘星橋橋下澗水如神瀆緣  
絙由天梯上梯如竿揭雲端距躍五百達  
重門足力竭矣倚試劍石箕坐更百步達  
三天門由此折旋而升垣行數百步歷階  
南下又折而東上爲太和宮宮面南香爐  
蠟燭三峯當席宮前則先朝神室徙置于  
茲由南天門入紫金城丹梯九轉出天柱

峯絕頂範金爲黃屋承以瑤臺帝位中央  
羣神列侍精美奪目儼若化人之居即今  
之國工宜不及此正位東鄉高出七十二  
峯如羣弟子侍先師莫不齋立近則金童  
玉女峯二當膝承之左三公右九卿帶七  
星揖五老僊人隱士順風而翔白雲出沒  
衆壑間如觀陸海諸峯或如碣石或如蓬  
萊鉅如斷鰲幻如結蜃細如漚鳥脩如址  
冥之鯤雜出如珊瑚枝浮如萍實壘壘乎

如鞭驅石泥乎如漢使者之乘槎遠而望  
之方城一耜漢水一甌掩楚蜀畧周秦即  
嵩華衡霍匡廬峨嵋悉辟易無何有之鄉  
矣乘磴西下爲清微宮僻居深谷中其制  
不廣然以幽勝妙華巖著焉南巖當太和  
之陽宮北面據五龍之奧宮右石延覆於  
道其上有巨人跡若倒懸宮後即南巖脩  
數十丈高數丈巖下峭壁數十丈東西脩  
數百丈如高壙巖中列祠事三亭二即神山

多倬詭此爲擅場其下有禮斗臺徑絕罕  
至西出如乘壙右上躡飛昇臺其旁露臺  
臺當志心石臺端有蛇徑通一室當其抄  
以居宮東北欵火巖亭附巖畔距展旗峯  
近下視紫霄展棋爲尹喜巖今居比丘脩  
不二法由南巖宮下爲滴水巖僂侶巖度  
竹笆橋入青羊澗青羊巖當澗之曲虛無  
廬渡青羊橋躋五龍千步而峻門垣九曲  
始達應門宮制九重前列階八十有一後



七十有二至高矣左高殿奉玉像五相傳掘土得之其制不異庸工好事者神之耳宮前有五井天地池日月池宮後當五龍峯其上有五龍池則其窟宅也凌虛巖去宮五百步一黃冠居之每飯必有餘以待衆祖衆祖皆喜否則破釜餽去莫之誰何巖前則希夷誦經臺今尚盛臺出臨澗當其上爲亭去宮五十步爲自然菴故有鍊丹池今始復出五龍渡磨鍼澗過隱僊巖

巖虛明視北道諸巖爲勝次繫馬峯爲仁威觀繚垣方廣數十丈石渠衡之就中爲石梁當門以度出茅阜峯下爲五龍行宮地始平脩廣楚楚過此則玉虛道也譬之宮室遇真爲垣屋玉虛爲廷淨樂爲沛宮紫霄爲廣內太和則帝坐也南巖五龍清微之屬皆爲離宮朝天爲掖門元和爲象魏迴龍復真仁威行宮皆行在耳語規制則首玉虛次淨樂語形勝則首南巖次紫

霄次五龍至若羣山萬壑泉石巖阿各擅  
一竒更僕不可悉數大都天閔靈秀以待  
明時帝力神功于斯爲備且也稽古定制  
不藉有司遍遣中貴人藩大夫掌其禁令  
以故草木茂鳥獸馴其斯爲地道之章游  
觀者之至樂也人言山羸水訕猶若有憾  
焉夫右灑灑左滄浪江漢交流振以鄂渚  
二別則玄武之象外戶在焉日觀孤高下  
臨湯谷古者海岳爲匹亦通山澤之義與

彼規規而闕一隅是以距臣目者也

太和山記二

余三仕楚太和竝載方祀中戊午冬余以  
二千石至從所部脩祀典三宿太和天鷄  
鳴輒登絕嶺觀日出下視無際熠若燭龍  
之躍九淵頃之天門開始辨色山積雪如  
羣玉觀益竒乘輿過妙華巖就辟穀者與  
語獨歸齋室從者莫知所之比下南巖循  
步欄望天柱皚皚乎五城萬雉夫非白玉

京邪俯闕五龍冰雪塞路不果往過紫霄  
履雪出禹跡亭上若從蒙莊子游徧歷福  
地亭臺奄忽昏暮月幾望對展旗峯如雲  
母屏歸卧神樓屏明燭戶牖生白視懸寓  
若冰壺蚤起登太子巖過巖棲者相揖出  
亭下下紫霄行者肩摩入山如市一徑東  
涉澗徑玉虛巖澗道陰陰人跡幾絕避喧  
而見獨不亦僊僊乎哉暮抵望僊樓月滿  
魄明視紫霄較甚旦日歸矣譬之染指曾

未屬厭辛酉將入閩乃再至索中載父乙  
爵襄王孫遣歌者從余先入玉虛巖雨大  
至巖中望雨如機絲百丈引澗中澗水盈  
從者後至皆沒馬腹止巖下宿從黃冠飯  
黃梁明日次天門余下車納履以往車人  
曰無畏請以肩輿登於是駕壯夫二人百  
步遞更代若搏羊角而上薄太和將事及  
期雨不絕從祠官造帝所卽擁蓋猶霑衣  
至則天劃然開雲如席卷明霞奉白日出

當黃庭禮成雨復集人人以爲神應雖余亦不知其繇旦日周游載酒復登絕頂當軒奠父乙爵稽首颺言道昆幸得服事名山亦越三祀今且辭去請飲餞以行乃長跼舉醕者三徧禮羣神醕各一其右有奉劍者余挺劍出之祝曰寇數入閩願借太阿以張國討振衣而下天將當關余舉爵進曰公以赤心奉至尊不佞庶幾可質引滿立飲醕如初下摘星橋軟流水歌者進

爵爲天風之歌頃之天籟皆鳴若相倡和余以爲釣天之樂戒勿歌由南巖趨五龍所至皆信宿道中樂青羊澗別業樂誦經臺行次玉虛月望矣登樓命酒以次觴列僊至洞賓觴者二公好飲則真吾師質明發滄浪從此出境後十年至余將出鄖關望夏門柳侍中請行期先期往乃燂湯治浴室逆余宿沐浴堂明日由間道入羅公巖道中饒木石苑積不治假令刊木疏石

宜多奇始至望天柱諸峯猶宿雲際無何  
浮雲立盡如出青夫容旣而明滅縱橫如  
羽衣如縞帶已復盡冉冉如站鳶余宿羅  
公房六月衣袷明日盡東畧乃出復真過  
玉虛巖不果宿尋登福地有襍樹樹掛劍  
松下拔劍斫之五夜雨師清路塵旦日杲  
杲侍中命工除間道余乘小車登太和日  
方中其下五色雲見祠官以告侍中亦自  
南巖望見之旣禮玄君退就南榮啜焉隱

几居有頃起而周視舊游諸峯變幻多神  
竒卽三至未可僂指曳杖出香爐峯側命  
黃冠據其上作步虛聲間以洞簫奏雲門  
曲興盡乃反質明就道憚乘危杖至摘星  
橋指橋東遺址是當閭闔扈三公宜祠事  
文昌以應天象次萬文峯下刻石爲銘過  
南巖侍中語雲物狀余聞諸有道者具在  
山中開士周泰享居玉虛西隴舒復初石  
教會居柳林佛子圓性居尹喜巖獨顏希

子出就鄢鄢周故宦者事靖江王性通明  
善悟入與柴山人相師友竝稱法眼云舒  
善長生之術深入無生具大辨才其先爲  
柴山人弟子石故秦將西域法王子崇事  
之圓性祝髮京師具法相目攝諸徒屬卷  
舌不談談則纏纏不休適其意所欲出余  
先以使往畢爲之期余留南巖石子先至  
余執舊聞與語石灑然公豈宰官身邪不  
搗不厲而登彼岸其未也坐待明月琴師

就巖中奏琴旦日問尹喜品殿過佛子巖東  
北向門外多美箭爲藩巖中列兩楹虛其  
中奉佛佛子肅容入坐客當中雷旣而謝  
從游引客入卧內摩客腹私語佛邪佛邪  
田徃劫以來乃復相見抱膝就客疊疊多  
所開陳已而謂客喜游請先客乃授客杖  
先從竹徑出澗濱磐石據澗交流隄其下  
樹水草傍一巨石出臨岸斷木作曲闌當  
之咫尺若在濠梁其幽致可入繪事巖上

草木益茂柴荆爲周廬者二中有蓮池池  
水四時不涸池上一室蓬戶室中置繩床  
戶外竝列招提懸彩幡作滅度法池外一  
池差小自爲一垣垣中花木成畦多芳草  
其後由華門入中爲草亭方廣當身設坐  
具亭前分列八石宜坐門徒客笑曰公所  
居足稱精舍公安事此其游戲三昧者邪  
佛子曰嘻此故豺狼居耳吾日事樹藝遂  
成園林客勉矣出就谷口客迴車旦日期

周子五龍宮周後至中道遇暑雨畢易衣  
履始相見西齋周告勞余不欲煩以口舌  
乃出日月池上過誦經臺羣雉遞鳴山梁  
不避人語侍中請臺端行酒列炬乃歸旦  
日次行宮石子將舒子至舒卽次以機接  
余石數目余機不入石笑曰公將以聞見  
取乃今不涉聞見惡手取之故不入也語  
未卒相與過玉虛列坐月明中將叩實義  
會侍中倦而思寐罷勿談明日登望僊樓

語其概乃余猶多扞格然亦有味乎其言  
是夜月始盈遂還行部計期則十年周矣  
余適有天幸十年三游始與貴游者俱局  
趣不自得再至則余爲政然亦不失爲俠  
少游乃今吊詭得朋視昔游爲猶賢矣要  
以游方之外時而汗漫時而逍遙其斯爲  
采真之游余未能也

大岳文昌祠碑記

天官書斗魁戴匡六星曰文昌宮一曰上

將二曰次將三曰貴相四曰司命五曰司  
中六曰司祿祠家則以其降神于蜀率象  
神而祠之尊北極者主玄君尸祝之義鈞  
也大岳專祠北極百神附焉顧文昌迄今  
不祠不佞嘗言之柳使君所使君謝曰昔  
在司禮

先帝幸以文昌像賜朝朝至于今奧事之母敢  
失隊

先帝崇事大岳不帝介丘



今上幸而使朝奉璽書主祠事方懼無以稱  
上任使倍

先帝恩乃今依比極祠文昌且尊

君賜禮也於是相與經始得隙地于三公峯之

陽東距天門可當斗口甃石高若干尺爲

堂廣若干筵堂外層軒待乞靈者夫北斗

定四時繫八極而文昌用事則文武爵祿

之司其命曰文右文事也我

二祖用武定天下以文守之當時若劉文成以

下諸臣庶幾名世

孝宗守文繼治王文成乃在公車關中洛下竝

鳴文始興矣

世宗操禮樂爲治天下文明在事之臣各用其

職諸尚書郎奮起若駕八駿而馳崑崙何

翩翩也

今天子聖明無改

先帝之舊閱儒秉國莊士盈廷海內名家罔有

遺佚以故文德四洽遠人來歸得全全昌

此其時也禮時爲大祠不亦宜乎使君故  
嘗主歲書以知禮顯是後也則天象協地  
宜興人文尊

主德於禮合矣故使君決筴從之其經費悉取  
諸舍中筦庫之士無所預會藩大夫李君  
以部署至計日而祠成楚人祠故有歌祖  
迎皆用此大岳在楚請爲神楚歌歌曰列  
幽宗兮天閭疏文石兮藝堂躡瑤光兮當  
戶帥三公兮鴈行靈之來兮雍雍乘歆玉

兮雲中臣聖哲兮爲後黜口耳兮鴻濛履  
遠遊兮瓌鏘升天衢兮張皇道導羣賢兮先  
路熾明德兮無疆釋余驂兮聞風緩余佩  
兮離宮覲昌暉兮當世歷千祀兮升中  
隆慶五年夏四月壬寅新都汪道昆題石  
表

國朝

太和山宮觀成賀表

任自垣 太常寺少卿

大岳太 and 山玄天玉虛等宮提點臣任自  
垣欽惟

聖朝建立

全殿成造各宮觀完備謹奉表稱

賀者臣自垣等誠歡誠忭稽首頓首

上言伏以

皇圖廣大萬方共際於

明時

仙宇完成千載有光於

玄教神人胥慶海宇均懽恭惟

皇帝陛下

聖德同

天至明如日

躬膺

天眷四時序而歲功成

治致雍熙萬國安而人心樂乃新宮觀用答

神明上以薦

太祖高皇帝

孝慈高皇后在

天之靈下以爲四海生民造無窮之福規模雄  
偉

像設尊嚴

輝光與

日月而並明

事業與

天地而同久豈特爲

盛時之瞻仰永以爲萬世之尊崇皆由

聖意之昭孚是以

天真之顯應

圓光屢現祥瑞同符此誠

皇上福壽之徵

宗社太平之慶也臣自垣等守職玄門感  
恩難報仰

紫宸之三祝祈

聖壽以齊天臣無任瞻

天仰

聖激切屏營之至謹奉

表稱

賀以

聞

大邑大和山誌卷之五終

